

Visoki predstavnik se obratio Političkom i sigurnosnom odboru Vijeća Evropske unije

Visoki predstavnik i specijalni predstavnik Evropske unije, Christian Schwarz-Schilling danas se u Briselu, zajedno sa generalom Vicenzom Coppolom, šefom Policijske misije Evropske unije, obratio Političkom i sigurnosnom odboru Vijeća Evropske unije.

Drugog dana svoje dvodnevne posjete Briselu, Christian Schwarz-Schilling je Političkom i sigurnosnom odboru Vijeća Evropske unije predočio najnovije informacije u vezi sa političkom situacijom u Bosni i Hercegovini (BiH), pri čemu se dotakao i implikacija prošlonedjeljne odluke Vijeća za implementaciju mira (PIK) o zatvaranju Ureda visokog predstavnika (OHR), koje će uslijediti 30. juna 2007. godine.

Visoki predstavnik i specijalni predstavnik Evropske unije je citirao tekst komunikea PIK-a u vezi sa zatvaranjem OHR-a, naglasivši da se Upravni odbor PIK-a "saglasio da u februaru 2007. godine razmotri i potvrdi svoju odluku o zatvaranju OHR-a, pri čemu će uzeti u obzir ukupnu situaciju u BiH i regionu".

U svom obraćanju visoki predstavnik je takođe izložio argumente zašto bi Evropska unija trebala osnažiti svoju prisutnost u BiH tako što će pojačati prisutnost Ureda specijalnog predstavnika Evropske unije i osigurati dovoljne resurse za njegovo nesmetano funkcioniranje, s tim da će se ove aktivnosti odvijati paralelno sa aktivnostima na postepenom smanjenju broja osoblja OHR-a.

"Smatram da se u okviru aktivnosti na obezbjeđenju resursa za nesmetano funkcioniranje Ureda specijalnog predstavnika Evropske unije treba uzeti u obzir i proces smanjenja broja

osoblja OHR-a", rekao je Schwarz-Schilling u svom obraćanju Političkom i sigurnosnom odboru.

Christian Schwarz-Schilling je takođe govorio o reformi policije naglasivši da je to jedan od preduslova za potpisivanje Sporazuma o stabilizaciji i pridruživanju (SSP) sa Evropskom unijom. Tri principa Evropske komisije za reformu policije su sljedeća: sve zakonodavne i budžetske nadležnosti za sva pitanja policije moraju se nalaziti na državnom nivou; nema političkog uplitanja u operativni rad policije; i funkcionalna lokalna policijska područja moraju se utvrditi na temelju tehničkih kriterija za rad policije, pri čemu se operativno zapovjedništvo provodi na lokalnom nivou.